

դէն դագաղը կրողներն ու յուղարկաւորները:

Թաղելու ժամանակ գերեզման փորողը երեք բուռ հող է գցում գերեզմանի մէջ, որն օրհնում է քահանան. միւս յուղարկաւորներն էլ մի-մի բուռ հող գցում վրան. ապա գերեզման փորողները հոգով լցնում են գերեզմանը և մի թոււմը շինում վրան և խունկ ծխում: Թաղման կարգն աւարտելուց յետոյ յուղարկաւորներն իբրև մխիթարութիւն հետևեալ խօսքերն են ուղղում ննջեցեալի տիրոջը. — «Աստուած օլորմի հոգուն, Աստուած դատաստանը քաղցր անի», իսկ նա էլ պատասխանում է. — «Աստուած տայ ձեզ ուրախութիւն, մենք գանք ձեր ուրախութեանը»: Այնուհետև խմբովին գնում են մի առւի կամ աղբիւրի ջրի վրայ և լուսուում, ապա հաւաքւում ննջեցեալի դռան առաջ և քահանային սպասում: Ննջեցեալի տէրը բոլորին հրաւիրում է ներս ճաշի, այս ճաշը կոչւում է «հոգէհաց»: Ընդհանրապէս փլաւ են պատրաստում: Կանայք և տղամարդիկ առանձին ճաշում են, ապա բոլորը կանգնում են, քահանան հոգեհանգիստ է կատարում, որից յետոյ ցրւում են: Իսկ մօտիկ ազգականներն երեք օր «հոգէհաց» են ուտում:

Այնուհետև ննջեցեալի տանն երեք օր սուգ են պահում. տղամարդիկ չեն սափրւում, գործի չեն գնում, իսկ կանայք կար չեն տնւում, ճախարակ չեն մանում, ոչ մի տեղ չեն գնում: Սուգի առաջին օրը կոչւում է «թաղմաք», երկրորդ օրը՝ «էգնահայ», իսկ երրորդ օրը՝ «եռաձաղ լւանալ»: Նոյն օրը կանայք քնիթակալները, իսկ տղամարդիկ թաշկինակները լւանում են, որով վերջանում է սուգը: Բացի եօթօրէքից՝ յառասուճին և տարեկիցին ունեւոր մարդիկ երբեմն պատարագ են մատուցանել տալիս ու հոգու հաց բաժանում, իսկ տարին մի անգամ գնում են գերեզմանատուն, խունկ ծխում և նրանց հոգու փրկութեան համար հաց բաժանում:

Գերեզմանացում: Գերեզմանատներն ընդհանրապէս գտնւում են գիւղին մօտ, արտերի կամ ճանապարհի կողքին: